



⑪ 故堀尾茂助君碑（所在地 春日井市関田町三丁）

第三項 故堀尾茂助君碑

君姓堀尾氏諱義康俗稱茂助其先出於高市親王親王六世孫曰峰緒歷官至從四位上右中辨承和十一年賜高階真人姓後改真人爲朝臣峯緒十七世孫曰邦經叙從二位食尾張丹羽郡御供所村子孫世居焉尾張大姓三十六人之一也邦經十世孫泰政改氏堀尾其子泰晴仕織田氏泰晴有三男長子吉晴仕豐臣氏次子次郎助幼有病爲僧後歸農住同國春日井郡關田鄉無嗣吉晴外孫正雲入繼正雲八世孫曰吉重娶平手氏生三男長即君也君天資豪邁容貌魁偉常好武兼嗜國學夙有報國之志遠近仰慕其風采嘉永中爲郡中總代上宣揚君德下伸暢民情當此時外舶出沒近海諸侯戒嚴藩侯命君任人馬之事安政中愛知郡高針本地村等村治擾亂侯命君攝總庄屋治之處分適宣民心安堵大得聲譽後屢轉職常立官民間不阿權勢不屈威赫扶弱抑強盡心調護又獻軍資賑窮乏侯嘉之進家格許謁屢有賞賜蓋異數也元治元年朝廷詔起征長之師侯爲征討都督君率百三十餘村役夫五百餘人從之至安藝更爲全藩役夫總締役督七千餘人事止而歸侯大賞功勞賜酒杯及絹帛王政維新之際天下騷擾人心恟恟君有唱正義鼓舞人心奔走藩命廢藩置縣之後亦屢轉職撫育郡民明治九年改租令出選爲春日井郡議員尋爲議長孜孜從事十一年辭職是時官定新租比舊額往往有增益羣議鼎沸百五村民推君爲總代哀訴縣廳而不省衆皆請越訴東京君乃決意訴之內務省及地租改正局上書數十勞心盡力殆涉二年然官制一定不可輒改及諭曰後年改租之時必有所變更於是定約而歸奉官旨諭村民事始結局十三年二月有命出仕愛知縣廳固辭不聽六月 聖駕西巡爲御用係周旋其事十四年三月爲東春日井郡長日夜勵精圖治然郡中改租以來人心不定教育及殖產之方未備君奮然蹶起奔馳東西開學舍盛教育築堤塘便水利創設農談會種子交換會於是百事就緒就中改修新木津水路最爲可傳初郡內居其末流者五村而水路狹隘有旱乾之患縣令國貞君察之命土木課長黒川氏計畫水路改修以謀之君君固有其志大贊之以諭村民村民應諾因釀四千餘金更修閘門尋欲廣水路村民憂工費巨額論議紛紜君慨然自以爲任懇論利害得喪之所在村民漸解悟納金請官以竣工川底廣三十六尺比舊增三分之二築提高六尺倍其舊長連數十村當工之未成沿岸住民或訴破換田園或憚移轉家宅羣情恟然殆將生變君與官吏開諭百方民心始定此舉也不唯五村之田得水利延變數村荒蕪瘠薄之圃爲田而餘潤墾關山林原野者凡二百町其益年多一年至今過三百町異日得幾良田亦不可測云是雖由政府保護之厚亦非官民一致協心戮力則不可成此大事業也其功勞亦大矣餘澤所及亦廣矣其他關郡治之功績不遑枚舉十九年四月二十日病歿享年五十有八歿之日闔郡之民莫不流涕惋惜而皆曰君之功烈有死而不朽者然今也君之恩惠既不可報言笑舉止不可得而見則相與共謀欲建碑以傳不朽及使余銘之余不肖辱承其後任爲郡長不敢辭其請乃序而銘之

遠矣天潢 一何洋洋 分派堀尾 流入尾張 中爲武弁 後歸農桑 世世胥宇 日關田郷
 維厥裔孫 其人淳良 修家則儉 立志則剛 稅法之改 或失其當 小民何知 將逞猖狂
 一身任事 屢入帝京 鎮撫黎庶 功績維彰 能便水利 高築堤坊 無旱乾患 禾稼豐穰
 童蒙就學 數十其庠 移風易俗 教育有方 餘澤猶存 終不可忘 銘斯貞珉 以傳遺芳
 明治二十年歲次丁亥四月中浣

愛知縣知事從五位勝間田稔題額

敬堂 埴堂 服部直衡撰
 福岡欽崇書

高木徳兵衛鐫

明治になり堀尾茂助は名古屋県第一一七区戸長、愛知県第三大区権区長を歴任。
 地租改正に関して改善につくしたが、木津用水、新木津用水により尾張東部の開
 発が進むにつれて各地に水争いが発生した。
 東春日井郡長になった堀尾茂助は黒川治愿とともに改修工事が出来るよう村民
 を説得した。